

Marisol Building un joya di arquitectura

Lo mantené e originalidad y embeyecé un poco mas e parti aki

ORANJESTAD - Despues di a biba di serca e precioso crecimiento di e obra arquitectico Miramar Building, Aruba ta para dilanti di un otro realisacion cu ta Marisol Building. E Diabierna aki lo ta e dia grandi na unda lo haci e acto simbolico di pone e promé piedra y asina divulgá e plannan y tambe haci mencion di esnan cu lo ta na encargo di e

realisacion di e proyecto aki.

E edificio cual a wordo diseña pa e hobennan talentoso Carlos Profeet y Orlando Hoevertsz, a pone un toque diferente na e arquitectura contemporaneo haciendo uso di liñanan no comun y toch tratando di mantené e liña tradicional cu ta conocí na Aruba. Como ehempel nos ta duna e edificio di Toeristen Bureau cu no ta keda mucho leeuw di e edificio nobo aki.

Marisol Building al igual cu Miramar Building lo consistí di dos piso cu lo wordo alquilá cu esnan cu ta desea di pone nan oficina ey den.

Mientras cu e 3er piso superior lo wordo construí exclusivamente pa condominium luhoso cu lo tin un bista precioso riba tanto e lama como e centro di Aruba.

Marisol Building un edificio cu ta hiba 2500 m2 ta proyectá pa keda clá cu su promé fase Februari 1995 y di dos fase na April 1995.

Den un entrevista cu Anthony Blok di BTA (Block Technical Advisers) Group, nos por a comprendé cu den su totalidad e proyecto lo costa 5 milyon florin.

"Cu e compra di Harbortown dor di META

Corp. e posibilidad di éxito pa tur loque ta bienes raiz a aumentá mucho mas", Anthony ta relatá.

"E parque "Reina Wilhelmina" ta den proceso di renobacion y manera ya ta bisto, e lo bira un presiosid.

Marisol Building lo engrandesé e infraestructura y sigur lo ta un joya mas cu lo contribuí na e proceso di modernizá nos centro, sin tin e necesidad di mishi cu naturaleza." Anthony ta sigui bisa cu orguyo.

E comerciante cu ta interesá por yama BTA Group na 35454 pa mas informacion. □

